

Terminau la stagiun sil tierz plaz

La dumengia avon in'jamna ein las giugaduras dils Desertina Bulls serendidas pil davos campionadi a Zumikon. Per tuttas era ei clar ch'ei dat buc ina semplra runda.

Encunter il quart ed igl empren dalla tabella, omisdus dus ferms adversaris, sto tut constar per ch'ei reusseschi. Aschia muncava ina premissa gia avon ch'ils giugs entscheivien: Cun pliras impurtontas absenzas, giugaduras ch'eran buca dil tut fittas muort blessuras ni malsaanas.

In gol decida il giug

Cun in'aulta pressiun egl empren giug emprovan las giuvnas da Mustér da metter spert sut squetsch las damas da Wängi. Quei ha funcziunau mo miez bein. Las empremas schanzas da sittar igl empren gol ha Wängi. Quellas parescha *Mila Demont* denton senza problems. Ella 10avla minuta sto il goli dallas Sursilvanas denton tuttina prender la balla ord igl agen gol suenter in culp liber da Wängi: 0:1. Il giug ei adina puspei vegnius frenaus dils arbiters muort fouls dallas adversarias ni era dils Bulls. Aschia eis ei sur igl entir giug ora stau grev d'anflar il fil per la giuvna equipa da Mustér. Igl adversari fageva buca sempel als Bulls. Ellas stevan fetg bein ella defensiva e dils Desertina Bulls ha ei muncau sur igl entir giug ora las ideas per vegnir tier bunas caschuns da sittar igl empren gol. Aunc avon pausa hai dau dus castitgs da duas minutas encunter las damas da Mustér. Il boxplay dils Bulls ha denton funcziunau bein ed aschia han ei era buca lubiu in ulteriur gol agl adversari.

Suenter pausa eis ei iu vinavon cun massa interrupziuns, castitgs e paucas bunas schanzas per las giuvnas dalla Surselva per saver volver il giug. Desertina Bulls – Wängi 0:1.

Terrada encunter il capogruppa

Suenter in giug pausa spitgava il victur dalla gruppa, Fortitudo Gossau. Quei giug han ils Bulls entschiet meglier ch'igl empren. Gia las empremas minutas vegnan ils Bulls tier duas bunas caschuns da sittar in gol. Quei ha denton buca mumentau igl adversari. Lezzas vegnevan meglier e meglier el giug. Las Sursilvanas han empruau da star cumpact ella defensiva, quei ha era funcziunau dètg bein, denton era Gossau mintga ga in pass pli spertas ch'ils Bulls. Aunc avon pausa stat ei 3:0 per Gossau.

Suenter pausa emprova il trenader da dar enzacons impuls cun far midadas da posiziuns. Quei ha era purtau fretg. Tuttenina secumbineschan las giuvnas da Mustér cun bialas staffettas da pass tochen avon gol digl adversari. Aschia sto il goli schar rebatter la balla suenter in siet da *Selina Giger* e *Janna Caduff* reagescha il pli spert e sietta igl empren gol pils Bulls. Quei ha dau in stausch atras l'equipa e cuort suenter gartegian ils Bulls mo igl alumini dil gol da Gossau. Quei eis ei denton era gia puspei stau cun il bien slontsch. Igl adversari aulza aunc inaga il tempo e vegn fetg bein el giug. Mintga giuvna dils Desertina Bulls emprova da tener

cumbatter, cuorer, bloccar siets, gudignar in duel, mo ei gida nuot. Igl adversari ei semplamein staus ina classa pli ferm. La fin spiardan ils Bulls quei giug claramein cun 1:7.

Tier rang ella tabella

Igl ei stau l'emprema runda da campinadi che la giuvna equipa da Mustér ha spiars omisdus giugs. Vid igl engaschi ha ei definitivamein buca muncau, igl ei semplamein buca stau la dumengia dils Desertina Bulls. Ina caussa positiva ha ei denton tuttina aunc dau quella dumengia. Era sch'igl ei buca reussiu da recaltgar puncts quella runda, terminscha l'equipa il campinadi sil tierz plaz dalla tabella. Ina gronda prestaziun per la giuvna equipa dalla Surselva. Suenter ina liunga e strentga sesiun han las giuvnas meritau las vacanzas. La proxima stagiun vegn puspei attaccau cun bia motivaziun las equipas dalla bassa. Ina per tuttas – tuttas per ina.

Silvan Giger, UHC Desertina Bulls

* Desertina Bulls: Alexandra Flepp, Noemi Zanin, Selina Giger, Jana Caduff, Aline Cajacob, Fabiana Bearth, Gada Cathomas, Anica Seiler, Corina Venzin, Ramona Simonet, Tamara Derungs, Anna Quinter e Mila Demont.